



Pranuar / Dorezuar Prilijeno/Prudato Received/Delivary	15.04.2022	2	viti god year
Organ /Njesia Organ /Jedinica Org /Unit	Nr Prot Br Prot Prot No	Shtojca Prilog Appendix	Sasia Kolicitna Quantity
SKRINSHOT	2183/2022		116



Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.199/2022

Këshilli i Pavarur Mbikëqyrës për Shërbimin Civil të Kosovës- Kolegji për Shqyrtimin dhe Vendosjen e Ankesave në përbërje nga: Ardita Haxhnikaj-Demi-kryetare, Arben Mehmeti dhe Jeton Koca-anëtarë, me Avdyl Bekteshi-Zyrtar i Lartë për Bashkëpunim Profesional në cilësinë e procesmbajtësit, ka shqyrtuar ankesën A.nr.199/2022 të datës 02.03.2022 të parashtruar nga ankuesi ne adresë kundër Vendimit

KD.Nr.001/22 të datës 09.02.2022 të Komisionit Disiplinor të Shërbimit Korrektues të Kosovës, në çështjen juridike "masë disiplinore", duke vepruar në pajtim me nenin 6 paragrafin 1 nënparagrafin 1.1 dhe nenin 18 paragrafin 1 nënparagrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim, me datë 15.04.2022, njëzëri mori këtë:

V E N D I M

I. Refuzohet si e pabazuar ankesa A.nr.199/2022 e datës 02.03.2022 e parashtruar nga ankuesi

II. Mbetet në fuqi Vendimi KD.Nr.001/2022 i datës 09.02.2022 i Komisionit Disiplinor të Shërbimit Korrektues të Kosovës.

A r s y e t i m

Ankuesi i punësuar në Shërbimin Korrektues të Kosovës, më datë 02.03.2022 ka parashtruar ankesë me numër protokoll 1113/2022 e regjistruar me A.nr.199/2022, në Këshillin e Pavarur Mbikëqyrës për Shërbimin Civil të Kosovës kundër Vendimit KD.Nr.001/22 të datës 09.02.2022 të Komisionit Disiplinor të Shërbimit Korrektues të Kosovës, për shkak të mos zbatimit të drejtë të dispozitave ligjore, vërtetimit jo të drejtë të gjendjes faktike dhe shqiptimit të masës disiplinore në kundërshtim me Rekomandimin e Inspektoratit të Ministrisë së Drejtësisë Nr.01-03 të datës 06.01.2022.

Këshilli i Pavarur Mbikëqyrës për Shërbimin Civil të Kosovës (tutje referuar Këshilli) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave në

Këshillin e Pavarur Mbikëqyrës për Shërbimin Civil të Kosovës, më datë 08.03.2022 ka proceduar kërkesën për përgjigje në ankesën e ankuesit tek Shërbimi Korrektues i Kosovës. Ndërsa Këshilli me datë 14.03.2022 ka pranuar nga Shërbimi Korrektues i Kosovës përgjigjen në kërkesë me numër protokoll 1333/2022 së bashku me shkresat e bashkangjitura.

Kolegji për Shqyrtimin dhe Vendosjen e Ankesave, për vërtetimin e plotë dhe të drejtë të gjendjes faktike si dhe vendosje në mënyrë meritore, ka administruar këto prova: Ankesën me numër protokoll 1113/2022 të datës 02.03.2022 e parashtruar nga ankuesi në Këshillin e Pavarur Mbikëqyrës për Shërbimin Civil të Kosovës; Raportin i vetëvrasjes së të burgosurës i datës 30.12.2021; Vendimin me numër KD.Nr.001/2022 të datës 09.02.2022 të Komisionit Disiplinor të Shërbimit Korrektues të Kosovës; Raportin e ngjarjes/incidentit/shkelje i datës 30.12.2021 nga B.S, M.H, SH.M; Plani eventual-vdekja në burg i datës 30.12.2021; Regjistrimet Ditore; Shkresë për inicimin e procedurës disiplinore ndaj ankuesit e datës 12.01.2022; Raporti i Hetimit i datës 11.01.2022; Raporti lidhur me rastin e vetëvarjes së të dënuarës i datës 06.01.2022; Kërkesën për përgjigje në ankesë e datës 08.03.2022; Përgjigjen në ankesë e datës 11.03.2022; Ndryshimin dhe Plotësimin e Kontratës e datës 07.05.2019; Kontratë Pune për kohë të Pacaktuar e datës 02.11.2018; Raporti i Hetimit i Shërbimit Korrektues të Kosovës i datës 30.12.2021; Raportin propozues nga Komisioni multidiciplinar për menaxhimin e rasteve me rrezik për vetëvrasje i datës 14.05.2021 me numër reference MSh/DSH/QKFL/55/2021; Deklaratën e datës 31.12.2021 të Zv/Drejtoreshës L.S; Regjistrimet ditore të gjendjes dhe sjelljeve të burgosurit M.K; Deklaratën e datës 31.12.2021 të udhëheqëses së pavijonit R.L; Raportin e Ngjarjes i datës 30.12.2021 nënshkruar nga H.K; Raportin mbi gjendjen shëndetësore të paraburgosurve të datës 02.11.2021 me numër Nr.508; Raportin mbi gjendjen shëndetësore të paraburgosurve të datës 10.09.2021 me numër Nr.551; Raportin mbi gjendjen shëndetësore të paraburgosurve të datës 20.09.2021 me numër Nr.576; Deklarata e V.U; Deklarata e S.Y; Njoftimin për vdekje në burg i datës 30.12.2021; E-mailin e datës 30.12.2021 dërguar nga F.M për I. D; Vendimin e datës 20.10.2021 për themelimin e Komisionit; Regjistrimet ditore të gjendjes dhe sjelljeve të burgosurit M.K të datës 30.12.2021; E-mailin e datës 03.09.2021 dërguar nga S.B dërguar G.M; Njoftimin e datës 06.09.2021 dërguar nga menaxheri i rastit N.S dërguar për S.B; Regjistrimet ditore të gjendjes dhe sjelljeve të burgosurit M.K e datës 29.12.2021; Regjistrimet ditore të gjendjes dhe sjelljeve të burgosurit M.K e datës 28.12.2021; Raporti i Mbledhjes Shëndetësore i rastit M.K i datës 30.12.2021 përgatitur nga Dr. L.H, Udhëheqëse e NJSHB/QKFL; Deklaratën e datës 30.12.2021 nga Kryeinfermierja A.S; Deklaratën e datës 30.12.2021 nga H. Q; Raporti Mjekësor i datës 30.12.2021; Plani Eventual-Vdekja në burg-Procedura e veprimit të oficerit në dhomën e kontrollit i datës 30.12.2021; Deklaratën 38 të S.Y; Deklaratën 39 e V.T; Shkresën e datës 30.12.2021 me numër rendor:304 me shkresën e bashkangjitur të datës 31.12.2021 prej tre (3) faqesh; Procesverbalin e intervistës me stafin i datës 05.01.2022 me katër (4) shkresat e bashkangjitura të datës 31.12.2021; Shkresën e procesverbalit të datës 05.01.2022 i orës 10:30; Shkresën e procesverbalit të datës 05.01.2022 i orës 09:50; Shkresën e procesverbalit të datës 05.01.2022 i orës 14:55; Shkresën e procesverbalit të datës 05.01.2022 i orës 14:00; Shkresën e procesverbalit të datës 05.01.2022 i orës 11:00; Shkresën e procesverbalit të datës 06.01.2022 i orës 10:35; Shkresën e procesverbalit të datës 06.01.2022 i orës 11:25; Shkresën e procesverbalit të datës 06.01.2022 i orës 12:15; Kartoni i evidencës së vizitorëve sipas listës së planifikuar Form 3.3.2/1; Kërkesa për kontroll ose hospitalizim e datës 15.09.2020 për M. K; Kërkesa për kontroll ose hospitalizim e datës 15.02.2021 për M. K; Fletë lëshimi i datës 25.03.2021 me numër amzës:34/29; Raporti i Departamentit Shëndetësor të Burgjeve i datës 28.04.2021 në përbërje prej njëzetedy (22) faqesh; Aktvendimin me numër P.nr.328/21e Gjykatës

Themelore në Prishtinë-Departamenti i Përgjithshëm i datës 27.04.2021; Aktgjykimin me numër P.nr.328/21 i Gjykatës Themelore në Prishtinë-Departamenti i Përgjithshëm i datës 25.05.2021; Aktgjykimin me numër PA1.nr.798/2021 i Gjykatës së Apelit të Kosovës i datës 19.08.2021; Vendimi për formimin e komisionit të brendshëm hetimor i datës 31.12.2021; Aktvendimin e Panelit për lirim me kusht me numër PLK.D.nr.563/21; Raportet përmbledhëse për lirim me kusht i datës 17.09.2021; Kualifikimi për shqyrtim për lirimin me kusht për të dënuarën M. K i datës 20.09.2021; Raportin përmbledhës nga Ekipa profesioniste e institucionit korrektues për lirimin me kusht i datës 27.09.2021; Raportin shëndetësor për të burgosurën M.K 23.09.2021; Deklaratën e datës 24.09.2021; Raporti Social për falje i datës 27.09.2021; Deklarim-premtim lidhur me mbikëqyrjen pas lirimit me kusht; Raporti përmbledhës për gjykatë për lirim me kusht të parakohshëm i datës 23.12.2021; Kërkesa për lirim të parakohshëm i datës 23.12.2021; E-mailin e datës 24.12.2021 dërguar nga për Raporti i vlerësimit për regjime i datës 04.10.2021; vendimin e datës 07.05.2021 i Drejtorit të QKFL; Raportin Inicieux disiplinor; Njoftimi i të burgosurit për akuzën dhe kohën e seancës dëgjimore i datës 06.05.2021; Shënimin Zyrtar i datës 06.02.2021; Vendimin e datës 06.10.2021; Raporti inicieux i datës 05.10.2021; Procesverbalet e seancave të komisionit për datat respektive 24 dhe 25.01.2022 për ankuesin dhe të tjerët; Raport inicieux i datës 02.09.2021; Raport inicieux i datës 06.04.2021; Shkresën zyrtare të datës 06.04.2021; Deklaratën e Raport për dëmtime trupore eventuale i datës 06.04.2021; Raportin e vizitave i datës 30.12.2021; Raportin mi gjendjen shëndetësore të paraburgosurve i datës 03.09.2021; Regjistrin mbi informatat e të burgosurës me numër: QP-LP:000029/21; Procesverbali i intervistës me R.L të datës 22.01.2022; Deklaratën e datës 30.12.2021; Ftesën për intervistë të datës 21.01.2022 për M.A; Ftesën për intervistë të datës 21.01.2022 për L.S; Ftesën për intervistë të datës 21.01.2022 për H.K; Ftesën për intervistë të datës 21.01.2022 për R.L; Ftesën për intervistë të datës 21.01.2022 për ankuesin; Ftesën për intervistë të datës 21.01.2022 për A.K; Ftesën për intervistë të datës 21.01.2022 për B.S; Ftesën për intervistë të datës 21.01.2022 për F.M; Regjistrimet ditore të gjendjes dhe sjelljeve të burgosurit për datën 30.12.2021 nga ora 03:30 deri në ora deri në ora 12: (i pa identifikueshëm numri); Deklaratën e Udhëheqëses së pavijonit R.L e datës 31.12.2021; Raporti i Ngjarjes i datës 30.12.2021 nga zyrtarja B.S.

Kolegji për Shqyrtimin dhe Vendosjen e Ankesave pasi që ka shqyrtuar dhe analizuar të gjitha shkresat e lëndës, konstatoi së janë të pa bazuar pretendimet ankimore të ankuesit, *SEPSE*:

Nga administrimi i provave materiale Kolegji ka gjetur së ankuesi sipas Ndryshimit dhe Plotësimit të Kontratës së datës 07.05.2019, është i punësuar në Shërbimin Korrektues të Kosovës në pozitën e punës *Mbikëqyrës i Lartë në Qendrën Korrektuese në Lipjan*.

Bazuar në Raportin e Inspektoratit të Ministrisë së Drejtësisë me numër protokollo 01-03 të datës 06.01.2022, Zëvendësuesi i Drejtorit të Përgjithshëm të Shërbimit Korrektues të Kosovës me datë 12.01.2022 ka iniciuar procedurën disiplinore ndaj ankuesit, me pretendimet se i njëjti me veprimet apo mosveprimet e tij gjatë kryerjes së detyrës zyrtare ka bërë shkelje disiplinore të parapara me nenin 46 paragrafi 3 nën paragrafi 3.1 dhe 3.3 të Ligjit Nr. 06/L-114 për Zyrtarët Publikë.

Komisioni Disiplinor me datë 09.02.2022 ka nxjerrë Vendim KD.Nr.001/2022, ku në pikën IV të dispozitivit ka shpallur ankuesin përgjegjës për shkelje të rendë disiplinore nga neni 46 paragrafi 3 nënparagrafi 3.1 të Ligjit Nr.06/L-114 për Zyrtarët Publikë dhe ndaj të njëjtit ka shqiptuar masën disiplinore "*Ndalimi i ngritjes në detyrë, duke përfshirë këtu rritjen e shkallës së pagës për periudhë dy vjet*", e përcaktuar sipas nenit 47 paragrafi 1 nënparagrafi 1.3 të Ligjit Nr. 06/L-114 për Zyrtarët Publikë.

Ankuesi në ankesën e parashtruar në Këshillin e Pavarur Mbikëqyrës për Shërbimin Civil të Kosovës pretendon që Komisioni Disiplinor me rastin e shqiptimit të masës disiplinore ka bërë mos zbatim të drejtë të dispozitave ligjore, vërtetimi jo të drejtë të gjendjes faktike dhe ka vepruar në kundërshtim me Rekomandimin e Inspektoratit të Ministrisë së Drejtësisë Nr.01-03 të datës 06.01.2022.

Bazuar në dispozitat e Ligjit Nr.06/L-114 Për Zyrtarët Publikë i zbatueshëm nga data 09.07.2020 sipas Aktgjykimit me numër reference AGJ 1583/20 të datës 09.07.2020 të Gjykatës Kushtetuese të Republikës së Kosovës, përkatësisht sipas nenit 4 të këtij Ligji me të cilin është përcaktuar se: *1.Nëpunësit profesional të shërbimit diplomatik dhe shërbimi korrektues janë nëpunës civilë me status të veçantë, të cilët rregullohen me këtë ligj dhe me ligj të veçantë, 2.Rregullimi me ligj të veçantë, sipas paragrafit 1 të këtij neni, duhet të jetë në pajtim parimet e përcaktuara me këtë ligj dhe mund t'i rregullojë ndryshe vetëm këto elemente të marrëdhënies së punës: 2.1. kushte të veçanta apo shtesë për rekrutim; 2.2. të drejtat ose detyrimet specifike të tjera nga ato të parashikuara me këtë ligj; 2.3. rregullat e veçanta për zhvillimin e karrierës sipas sistemit të gradave; 2.4. zhvillimin profesional dhe nevojat për trajnime; 2.5. transferimin dhe sistematizimin e nëpunësve, rrjedhimisht me hyrjen në fuqi të këtij ligji, nëpunësit e shërbimit korrektues kanë statusin e nëpunësve civilë me status të veçantë, respektivisht se të njëjtit i nënshtrohen legjislacionit në fuqi për nëpunësit civil si dhe ligjeve të veçanta lidhur me fushat e specifikuar sipas paragrafit 2 të nenit 4 të këtij ligji.*

Lidhur me shqyrtimin e pretendimeve ankimore, Kolegji ka analizuar dispozitat e Ligjit Nr.06/L-114 për Zyrtarët Publikë, respektivisht kapitullin IV lidhur me Disiplinën në Shërbim Civil, si dhe dispozitat e Rregullores (QRK) Nr.11/2020 për Disiplinën dhe Ankesat e Zyrtarëve Publikë, me të cilën është rregulluar procedura dhe masat disiplinore për nëpunësit civilë, ndërsa në aspekt të përgjegjësisë disiplinore, Kolegji ju referua nenit 45 të Ligjit Nr. 06/L-114 për Zyrtarët Publikë ku theksohet se: *Përgjegjësia disiplinore është moszbatimi apo zbatim jo i duhur i detyrave të punës dhe detyrimeve të tjera ligjore, që përmban elementet si në vijim: 1.1. "ekzistimin e veprimit të paligjshëm apo mosveprimit;" 1.2. kryerjen e veprimit me faj apo mosveprimit; 1.3. ndodhja e pasojës 1.4. ndodhja e dëmit; dhe 1.5. lidhjen shkakësore ndërmjet veprimit të kryer dhe pasojës/dëmit. Ndërlidhur me këtë e në kuptim të nenit 46 paragrafi 3 të të njëjtit ligj si shkelje të rënda disiplinore janë kualifikuar: 3.1. mospërmbyllja e detyrave të punës; 3.2. mosrespektimi i afateve të caktuara në përmbylljen e detyrave, të cilat kanë sjellë pasoja të rënda; 3.3. moszbatimi i dispozitave ligjore për përmbylljen e detyrave funksionale; 3.4. përfitimi në mënyrë të drejtpërdrejtë ose të tërthortë të dhuratave, favoreve, premtimeve ose trajtimeve preferenciale, të cilat jepen për shkak të detyrës; 3.5. braktisja e punës ose mungesa e paarsyeshme dhe e vijueshme për pesë (5) ditë pune apo më shumë; 3.6. shkelje e përsëritur e rregullave të kodit të etikës në Shërbimin Civil; 3.7. dëmtimi i pasurisë shtetërore, përdorimi i saj jashtë përcaktimit zyrtar apo keqpërdorimi i pasurisë shtetërore; 3.8. kryerja e përsëritur, brenda ose jashtë orarit zyrtar, të veprimeve që cenojnë nëpunësit civilë, institucionin apo Shërbimin Civil në tërësi; 3.9. shkelja e rregullave për ruajtjen e informacionit të klasifikuar apo të mirëbesimit për të dhënat e klasifikuara si të tilla; 3.10. shkelja e detyrimeve të përcaktuara në këtë ligj dhe në legjislacionin në fuqi; 3.11.Përdorimi i narkotikëve dhe substancave të tjera psikotrope të ndaluara ose të alkoolit në vend të punës dhe ardhja i delhur në punë .*

Nga vlerësimi i provave të lëndës përkatësisht bazuar në Raportin e Komisionit Hetimor të datës 30.12.2021, Kolegji ka gjetur se me datë 30.12.2021 e dënuara M. K rreth orës 12:36 ishte vetëvrarë me jelekun e saj në dritaren e dhomës. Me tej, sipas raportit në fjalë rrjedhë së stafi menaxherial prezent në ditën e ngjarjes nuk kishin arritur të menaxhojnë në mënyrë profesionale rastin e incidentit

të vetëvrasjes së të dënuarës M.K, duke mos bërë sigurimin e vendit të ngjarjes, tutje e vetëvrara gjate ditës së ngjarjes nuk ishte vëzhguar sipas kohës së përshkrimit në formularin përkatës për vëzhgim, ndërsa ankuesi në cilësi të Mbikëqyrësit të lartë nuk e kishte nën kontroll stafin në kohën e incidentit dhe nuk ka zbatuar planin eventual në rastin konkret.

Po nga Raporti i Inspektoratit të Ministrisë së Drejtësisë të datës 06.01.2022, rezulton se, ka pasur shkelje ligjore gjatë procedurës së mbylljes së të dënuarës M.K, pa pasur rekomandim apo konsultë me psikologun dhe neoropsikiatrin për të ndërmarr veprimin e mbylljes së të dënuarës pasi që e njëjta ka qenë në terapi psikiatrike, ka pasur shkelje të procedurave ligjore lidhur me observimin nga stafi korrektues pasi raporti i observimit i datës 30.12.2021 ishte plotësuar pa u shikuar për së afërmi e dënuara M.K., gjegjësisht stafi korrektues nuk kishte bërë observimin por vetëm kishte plotësuar formularët.

Komisioni Disiplinor i Shërbimit Korrektues sipas Vendimit me numër KD.Nr.001/2022 të datës 09.02.2022 ka konstatuar së ankuesi si Mbikëqyrës i Lartë, përkundër informatës për mbylljen e të dënuarës i njëjti nuk është interesuar për procedurën e mbylljes duke mos u kujdesur as për mirëqenien e saj dhe vizitën fizike ndaj të dënuarës në fjalë, dhe në ditën kritike pas dëgjimit të britmave të stafit për ndihmë lidhur me vetëvarje i njëjti dy herë tenton që fillimisht të informohet përmes telefonit për incidentin në fjalë e pas disa minutave pasi që nuk kishte mundur të dëgjohej me askënd përmes telefonit shkon në vendngjarje fizikisht. Ndërlidhura me këtë veprime, ankuesi as në ankesë por as në deklarinimin e tij në seancë të Komisioni Disiplinor më datë 24.01.2022 nuk ka pohuar faktin që ka vizatuar të dënuarën në dhomë edhe pse gjendja e saj nuk ka qenë stabile.

Në kuptim të përcaktimit të përgjegjësisë disiplinore të ankuesit, Kolegji ka shqyrtuar përshkrimin e detyrave të punës të ankuesit, nga është konstatuar se ankuesi si Mbikëqyrës i Lart përveç detyrave tjera është përgjegjës të *menaxhoj dhe mbikëqyr personelin korrektues vartës, është pjesë e ekipit për zgjidhjen e situatave të ndërlikuara me personelin korrektues, rregullisht viziton të gjitha zonat dhe hapësirat e burgut dhe raporton për çdo parregullsi, bënë planin e evakuimit në rast emergjent, e si rrjedhojë nisur këto përgjegjësi si dhe duke marrë parasysh faktet si me lartë, Kolegji vlerëson se veprimet/mos veprimet e ankuesit në ditën e vet varjes së të dënuarës M.K janë në shperputhje me nenin 25 të Ligjit Nr. 06/L-114 për Zyrtarët Publikë, ku përcaktohet se: *Zyrtari publik detyrohet të respektojë Kushtetutën dhe ligjin dhe të mbrojë interesin e shtetit dhe të drejtat dhe liritë e njeriut. 2. Zyrtari publik ushtron detyrat e tij me profesionalizëm, paanësi, pa diskriminim, në kohë, pa interes personal dhe në përputhje me ligjin dhe kodin e etikës.3. Zyrtari publik duhet të veprojë në përputhje me parimet e përcaktuara me këtë ligj, kodin e etikës dhe veprimet e tij duhet të jenë në funksion të themelimit dhe përforcimit të besimit të ndërsjellë dhe bashkëpunimit ndërmjet qytetarëve dhe administratës publike, Andaj, nisur nga ky konstatim, rezulton së Komisioni Disiplinor ka vërtetuar drejt gjendjen faktike duke konstatuar saktë përgjegjësinë disiplinore të ankuesit, si dhe ka cilësuar drejtë veprimet e të njëjtit si shkelje të rëndë disiplinore siç përcaktohet me nenin 46 paragrafi 3 nënparagrafi 3.1 të Ligjit Nr.06/L-114 për Zyrtarët Publikë. Po ashtu Kolegji vlerëson se Komisioni Disiplinor ka zbatuar drejtë dispozitat e Ligjit Nr.06/L-114 për Zyrtarët Publikë përkatësisht ka vepruar në pajtim me nenin 48 paragrafi 3 dhe nenin 50 paragrafi 1 të këtij Ligji, me të cilin theksohet se: *neni 48 paragrafi 3 ...3: Masat disiplinore të parashikuara në paragrafin 1.2 deri 1.4 të nenit 47 të këtij ligji, janë në kompetencën e komisionit disiplinor..... neni 50..Për përcaktimin e masës disiplinore të zbatueshme, mbikëqyrësi i drejtpërdrejtë ose komisioni disiplinor bazohet në: 1.1. shkaqet, rrethanat e kryerjes së shkeljes, rëndësinë dhe pasojat e saj; 1.2. shkallën e fajësisë; 1.3. ekzistencën e masave të tjera disiplinore të mëparshme të pashlyera, sipas nenit 47 të këtij ligji; 1.4. përprjekjet e mëparshme të nëpunësit për shumangien apo kufizimin e dëmit. 2.***

Masat disiplinore jepen në raport të drejtë me shkeljen e kryer. 3. Për shkeljet e rënda, jepen masat disiplinore të përcaktuara në paragrafët 1.2 deri 1.4 të nenit 47 të këtij ligji., rrjedhimisht Kolegji vlerëson së janë të pabazuara pretendimet ankimore të ankuesit së Komisioni Disiplinor me rastin e shqiptimit të masës disiplinore ka bërë mos zbatim të drejtë të dispozitave ligjore dhe vërtetimi jo të drejtë të gjendjes faktike.

Kolegji i Këshillit nga analizimi i vendimit të kundërshtuar me ankesë vërën se i njëjti ju referohet tetë (8) zyrtarëve, ku që të gjithë janë shpallur përgjegjës duke ju shqiptuar masa disiplinore veç e veç, kështu që refuzimi i ankesës A.nr.199/2022 të datës 02.03.2022 dhe lënia në fuqi e Vendimit KD.Nr.001/2022 të datës 09.02.2022 të Komisionit Disiplinor, ka të bëjë vetëm me pikën IV të dispozitivit të këtij vendimi.

Siç u tha me sipër, Kolegji për Shqyrtimin dhe Vendosjen e Ankesave pas shqyrtimit të shkresave të lëndës si dhe duke u bazuar në nenin 18 paragrafin 1 nënparagrafin 1.1 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës si dhe nenin 132 paragrafit 2 të Ligjit Nr.05/L-031 Për procedurën e Përgjithshme Administrative, vendosi si në dispozitiv të këtij Vendimi.

Vendimi hyn në fuqi në ditën e nënshkrimit nga Kryetarja e Kolegjit.

Këshillë juridike:

Kundër vendimit të Këshillit, pala e pakënaqur mund të iniciojë konflikt administrativ në Gjykatën Themelore në Prishtinë/Departamenti për Çështje Administrative, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS

Lënda me numër A.nr.199/2022

Avdyl BEKTESHI

Procesmbajtës

Ardita Haxhnikaj-DEMI

Kryetare e Kolegjit



Vendimi i dërgohet:

- Ankuesit
- Drejtorit të Përgjithshëm të Shërbimit Korrektues të Kosovës;
- Udhëheqësit të Burimeve Njerëzore në Shërbimin Korrektues të Kosovës; dhe
- Arkivit të KPMSHCK-së.

